

Dil vargau e dil present

Tschunavla notg da film a Sedrun

(anr/hh) Il Forum cultural Tujetsch organischescha questa fin d'jamna per la tschunavla ga la notg da film sil plaz scola a Sedrun. Da veser ein uonn treis contribuziuns che documenteschan arranschaments da pli baul e dil present.

L'emprema producziun che vegn mussada ei la «Revista 06/07» cun eveniments dalla Val Tujetsch filmai el decuors digl onn passau. Da veser ein rodund in miez tozzel registraziuns d'occurrenz a mintgamai treis entochen quater minutas. En ina secunda part vegn il cumin dalla Cadi tematisaus. Il forum muossa la historia da treis cumins. Ina ei quella digl onn 1933 cura ch'il mistral regent Vigeli Berther da Camischolas ha abdicau ed ei vegnius remplazzaus da *Giusep Condrau* da Mustér. Il film muossa co Vigeli Berther serenda naven da casa, vegn beneventaus dalla delegaziun dil cumin, sco era la tschentada a Muster. Da veser ei era la tschentada digl onn 1971 cun felecziun da mistral Teofil Schmid da Sedrun. In'ulteriura part da quei film sededichescha alla davosa tschentada dil cumin dalla Cadi igl onn 1999. La tiarza part dalla notg da film fuorma la documentaziun accumpignonta tiel studi à liung temps entras igl Institut per survetschs publics e turistics dalla Scofaulta S. Gagl davart la Neat.

Necessari da trer bilanza

Tenor il conorganisatur dalla notg da film, *Bruno Berther*, vegn il Forum cultural Tujetsch a trer ina bilanza suenter quella tschunavla ediziun: «Nus vegnin a stuer decider, schebein nus lein cuntinuar ni buca.» Ellas quater notgs da film d'entochen ussa ein differents films da pli baul e dil present vegni mussai. Igl ei semussau che films actuals dalla Val Tujetsch ein il pli tschercai e giavischai. Quei ei stau da constatar surtut igl onn vargau cun la presentaziun dil film da *Gieri Venzin* davart ils cavacristallas. Films da pli baul han apparentamein buca la medema calamita. «Davart la Val Tujetsch existan biars films, mo paucs han las premissas dalla qualidad da vegnir mussai e da catter interess. Igl ei facticamein aschia, che films produci cun professionalitad han megliers aspects d'attrer la gliued», di Bruno Berther. Plinavon ein differents films era en possess privat e vegnan buca mussai publicamein. In auter problem ei la revista annuala. Oriundamein era ei previu che tala vegni procurada da pliras persunas. Cheutras fuss ei stau pusseivel da far ina schelta dallas producziuns. Aschia ha la revista digl onn passau stuiu vegnir procurada da Bruno Berther persuls: «Quei ei en sesez donn, pertgei nus constatein adina puspei che differents fan film duront ils arranschaments. Producziuns da differents filmaders dessen in'otra tempra a quella revista.»

La notg da film ha liug venderdis, ils 3 d'uoost 2007 sin plaz scola a Sedrun ed entscheiva allas 20.30 uras. L'entrada ei libra.